

## **PV/SEV Basel:**

### **Bericht über die Fahrt ins Blaue vom Mittwoch 09. August 2023**

(Täggscht uf Baseldytsch)

Am Mittwuch demorge simmer vom Baanhoofplatz Basel zem Dräffpunggt gloffe und hänn dert e huffen elteri Yysebäänler\*innen näbscht Aagheerige droffe. Fraidig het ys dr Walti Merz begriesst und gsait, är fänd das scheen, wemme jetz zämme spontan via Rolldräppe zem Glais säggs yybere geen. Am Zugschluss syyg in zwai Wääge reserviert und dr Zugschluss syyg hinde und dangg Hälferinnen und Hälfer hämmer denn die Wääge kenne finde. E bitz verschrogge simmer scho wo mir d Aazaig vom Zug hänn gsee: Ziri isch aagschriibe gsi! Ziri, mues das syy? Ok, villicht goot s jo wyter uf e See.

Schiffifaare uf em Zirisee wär jo emänd no glatt und mit em Drämmli bisch jo schnäll dur die Stadt!

Dr Raiselaiter Peter Jakob duet ys in dr Verbindigslinie vo Olten au begriesse und sait, dass mer in Aarau scho wiider ussstygen und s Perron wäxle miesse. Siibenenzig Frauen und Männer mit und ooni Spazierstogg mache das mit well s jo, wenn nit uf Ziri wotsch, schlussändlig fascht kai anderi Alternatvie git! Reserviert syygi fir uns im Aaschlusszug uff Glais vier ganz vornen im Weschte, Also laufe mer fyyren und d Schuehsoolenabnytzig generiert no zuesätzligi Keschte! E baar Minute mien mer no warte, denn kunnt dr ICN und dert stygge mir yy und denn ändlig, elteri Lyt mien vyyl dringge, serviert men ys e feyjn Drepfli Wyy!

Do derzue git s au noon e wirgglig guet Brotgebägg, härgstellt us Brotdaig und gfyllt mit wirzigem Spägg!

In Biel stygge mer uss und laufen oder faaren an d Schiffländi aaben an Quai und frayjen ys uf e scheeni Schiffifaart mit der 'Ville de Bienne' uf em Bielersee. Mir seen d Sunnen und Wulgge, e huffe Räbbärge, scheeni Derfli und no vyyl mee, und im Hintergrund seen mer mit Glygg no d Alpe mit mee oder weeniger Schnee. An dr Sanggt Peters-Insle stygge mer uss, laufen yber d Insle in e scheeni Baiz. Also ins Reschtorant vom Kloschterhotel, in e scheene 'Saal' mit bsunderem Raiz. Bim e feyjne Midaagässen und guetem Wyy sinn d 'Fuessmarsch-Strapaze' vergässe. Alli sinn glygglig, zfriide und noon em Ässe sinn e baar mit Zigarren im Garte gsässe.

E feyjni Zigarre wirggt wirgglig Wunder, ai ai ai ... und s Zruglaufe zem Schiffstääg goot fascht vom elai!

Mit dr 'Stadt Biel' schwimme mir vo dr Sanggt Peters-Insle wyter uf em See und glyy scho kenne mer s historische Stedtli Erlach vom Schiff uss gsee. Dert stygge mir uss, laufen yber Stääg und Land und mit eme Poschtautikaare dien mer dur e draumhaft scheeni Landschaft ins Albert Anker-Dorf Ins grad faare. Mit dr S-Baan goot s wyter yber Kerzers zem Umstygge-Baanhoof in Bärn und well s in dr Unterfieerig e Käffeli git, warte mir uf dr näggschti Zug no Basel gärn. Im IC-Zuesatzmodul, fascht klimatisiert, frayje mir ys und es duet ys gar nit stingge, dass mer zem Abschluss, wie jedes Joor, e Mineral oder e kieels Bier derfe dringge!

No zää Stunde simmer wiider z Basel, glygglig, zfriiden und froo, und frayjen ys, wemmer s näggscht Joor wiider uf e Rais kenne koo!

**Ganz härzlige Dangg em gsamte OK fir die tolli Organisation und die glungeni Faart!**

eyjere Väärslibrinzler vom Bruederholz